



11. juli 2014

Inatsisartut Suleriaasianni § 37 naapertorlugu Naalakkersuisunut apeqqutit makku matumuuna saqqummiuppakka:

**Naalakkersuisunut apeqqut Naalagaaffiit Peqatigiit Meeqqat pillugit isumaqatigiissutaata ukiunik 25-nngortorsiorneranut atatillugu:**

**1. 20. november 2014 nallerpagu ukiut 25-t ingerlasimassapput Naalagaaffiit Peqatigiit Meeqqat pillugit Isumaatiigiissutaat Naalagaaffiit Peqatigiinni ataatsimeersuaqataasunit tamanit akuerineqarmat. Naalakkersuisut sunik pilersaaruteqarpat ulloq taanna malunnartinniarlugu?**

(Inatsisartunut ilaasortaq Andreas Uldum, Demokraatit)

### **Tunngavilersuut**

Meeqqat pillugit isumaqatigiissut inuit pisinnaatitaaffii pillugit isumaqatigiissutini siullersaavoq, meeqqat immikkut inatsisitigut illersorneqarsinnaangortinneqarmata. Naalagaaffiit Peqatigiit ataatsimeersuarneranni ulloq 20. november 1989 akuersissutigineqarpoq.

Isumaqatigiissummi naqissuserneqarpoq inuit tamarmik 18-t inorlugit ukiullit meeqqatut isigineqassasut taamaasillutillu Meeqqat pillugit Isumaqatigiissut naapertorlugu sullinneqarlutik. Naqissuserneqarpoq suliniutini meeqqanut tunngasuni meeqqat pitsaanerpaamik isiginiarneqartassasut.

Meeqqat pillugu Isumaqatigiissummi qularnaarneqarpoq silarsuarmioqatigiit ataqqissagaat, meeqqat illersorneqarnissartik pisariaqartikkaat taamatullu aamma inuttut pisinnaatitaaffeqartut. Naalagaaffiit Peqatigiit Meeqqat pillugit Isumaqatigiissutaata akuttunngitsumik nakkutigisarpaa, nunani ilaasortaasuni meeqqat qanoq innersut aamma paasisat takusallu nalunaarusiorfigineqartarput innersuussisoqartarlunilu.

Demokraatini iluarisimaarparput nunami maani amerlanerussuteqarluartut isumaqatigiissutiginiikummasuk meeqqat pisinnaatitaaffii sorsuutigineqassasut aamma meeqqat meeqqatut inuunissaminnut pisinnaatitaaffeqartut. Taamaattumik aamma neriuutigaarput Naalakkersuisut kissaateqarnerput ilassillugu Naalagaaffiit Peqatigiit Meeqqat pillugit Isumaqatigiissutaata 25-liinera malunnartikkumaaraat.

Apeqqutit akeqquneqarput ullut suliffiit naliginnaat qulit iluanni.